

Inatsisartut aalajangiiffigisassaattut siunnersuut, Naalakkersuisut peqquneqassasut utoqqarnut naleqquttunik marlunnik najugaqarfiliussasut, arfineq-pingasunut inissalimmik Najugaqarfik Elisibannguaq-mut atasussanik. Inissiassat aallartinneqariissapput 2013-imi ukiakkut ataatsimiittoqalersinnagu.

(Inatsisartuni ilaasortat Knud Kristiansen aamma Siverth K. Heilmann, Atassut)

Akissuteqaat

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Siullermeerneqarnera

Aallaqqaasiullugu siunnersuuteqartut Knud Kristiansen aamma Siverth K. Heilmann, inersimasut eqqarsartaatsimikkut kinguarsimasut eqqarsaatigalugit siunnersuuteqarnerannut qutsavigissavakka. Inersimasut eqqarsartaatsimikkut kinguarsimasut inuuneranni nalillit aamma akornuteqaratik periarfissaat sammisatut pingaaruteqarluinnartut Naalakkersuisut isigaat. Naalakkersuisut suleqatigiinnissaannut isumaqatigiissummi ilaatigut taaneqarput, inunnik sanngiinnerusunik sullissineq, soorlu sumiginnakkanik, innarluutilinnik, utoqqarnik tarnikkullu nappaatilinnik, sulinerlu taanna pissaaq ilisimasat katersorneqareersut aallaavigalugit. Tamanna Naalakkersuisunit pingartinneqarpoq.

Najugaqarfinnut tunngasunik allannguutinik suliaqarnissaq kissaatigigaanni, taava sianigisariaqarpoq, aningaasaqarneq, ingerlatsineq sanaartukkanullu aningaasartuutit pineqalersillugit kommunit aamma Namminersorlutik Oqartussat akisussaaffinni assigiinngitsuni qanoq inissisimanersut.

Ukiuni kingullerni marlunni innarluutilinnut tunngasut malunnartumik allannguuteqarsimapput. Allannguut annerpaaq ull. 1. januaari 2011-mi pivoq. Aningaasaqarnermut akisussaassuseq tamakkerlugu Namminersorlutik Oqartussaniit kommuninut tunniunneqarpoq. Ullumikkut angerlarsimaffiit aningaasaqarnerannut kommunit qullersaallutik akisussaasuupput.

Kommunit innarluutillit angerlarsimaffiinut aningaasalersuinerat marlunngorlugu immikkoortinneqarpoq. Siullermik kommuninut ataatsimoortumik tapiissutinut angerlarsimaffinnut aningaasartuutitut missingersuutini affai naatsorsuinermi ilanngunneqartanngillat. Aappaattut inunnut najugaqarfinnut inissinneqarsimasunut kommunit akileeqquneqassapput. Tamanna isumaqarpoq, ullumikkut Namminersorlutik Oqartussat innarluutillit najugaqarfiinut ingerlatsineranut aningaasartuuteqanngitsut, aamma aningaasartuutit nalinginnaasut kommuninut toqqaannartumik toqqaannanngitsumilluunniit akilerneqartarput.

Innarluutillit najugaqarfiisa ulluinnarni Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoqarfimmit suliarineqarput. Pineqartumut kommunit aningaasaqarnikkut akisussaasuupput, kisiannili Namminersorlutik Oqartussat ingerlatsineranut akisussaasuupput.

Innarluutillit najugaannut sanaartukkanut aningaasartuutit, matumani ilanngullugit ilaatigut Elisibannguaq allineqarsinnaanera, Namminersorlutik Oqartussanit akilerneqassaaq.

Aningaasaqarnikkut, ingerlatsinikkut aamma sanaartukkanut aningaasartuutitut akisussaassutsimik agguaaaneq pingaaruteqarpoq, pineqartumi allanngortitsinerit kissaatigigaanni. Najugaqarfinni inissat, atorfiit akuerisaareersut aamma illuutit amerlassusaannik allanngortitsinerit tamarmik kommunit qanimut suleqatigalugit aalajangerneqartariaqarput. Aammattaaq pineqartumi allanngortitsinerit pisariaqarput, aningaasat sapinngisamik pitsaanerpaamik agguataarnerisigut, aamma sapinngisamik paasinarsarluakkamik tunngaveqarluni. Aalajangersimasumik aalajangigassatut siunnersuummut tunngatillugu soorlu assersuutigalugu illuutit pigineqareersut siunertamut atorneqarsinnaasut, alliliinissanik aalajangermissat sioqqullugit qulaajarneqartariaqarput.

Elisibannuaq najugaqarfiuvoq 21-nut inissalik, taakkunanga inissat sisamat inersimasunut utoqqaanerusunut eqqarsartaatsimikkut kinguarsimasunut naatsorsuussaapput. Soorlu siunnersuuteqartut eqqortumik uparuaarat, ukiuni aggersuni sullinniakkanut taakkununga pisariaqartitsineq annertusiartortussaavoq. Ineriartorneq tamanna Naalakkersuisut ilisimavaat. Tamatuma isumagineranut najugaqarfiup Elisibannuup allilernera takussutissaasinnaavoq. Oqaatigissallugu pingaaruteqarpoq, ullumikkut pisariaqartitsineq nukinginnartorujussuunngimmat, annertusiartorlunili. Sammineqartoq tassaavoq aamma ineriartortoq, sianigisariaqartoq.

Unammilligassat ingiarniavissussagaanni, inissiat, inissat amerlassusiisa, sulisut qulakkeerneqarnissaannut aamma pisariaqartinneqavissunut sapinngisamik pitsaanerpaamik naleqqussarnissaq angusassanik toraagaqarluni suliniuteqarnek, Naalakkersuisunut pingaaruteqarput. Matumani 2011-mi Deloittep nalunaarusiaq suliarisimasaa uparuarneqarsinnaavoq. Nalunaarusiami tassani najugaqarfinnut tunngasunik pisariaqartitsinerit, amigaatit aamma killissaliiffiusut tamakkerlugit nassuiarneqarput. Taamaattumik nalunaarusiaq sammineqartumi siunissami allannguutaajumaartunut aallartiffiusutut pilersitsinermi ilaassaaq, matumani ilanngullugit allilerissutaajumaartunik tulleriiarineq. Soorunami kommunit sammisamilu qitiusumik suliniuteqartut qanimut suleqatigalugit tamanna pissaaq. Isumaginninnermut tunngasut pillugit suleqatigiinnissaq ataatsimoorlunilu kivitseqatigiinnissaq pingaaruteqarpoq. Pitsaasumik suliniuteqarnermut aalajangiisuulluinnassaaq, peqataasut tamarmik anguniakkamut atugassamullu isumaqatigiinnissaat, taamaalilluni suliniutit tulluurtumik peqatigiillutik ingerlasinnaaqullugit aamma inuiaqatigiinni sanngiinnerusunut atugassarititaasut pitsaanerulersinniarlugit.

Kalaallini inuiaqatigiinni sanngiinnerusut atugaasa pitsaanerulernissaannik siunnersuut Naalakkersuisut akuersaarpaat. Taamaattumik siunnersuuteqartut siunnersuutaat ulloq unnuarlu paaqqinnittarfinnut tunngasunik suliassanik nangitsinermi tusaatissatut tiguneqarpoq. Inersimasunik eqqarsartaatsimikkut kingusimasut atugaasa suli pitsaanerulersinnissaannik siunissami sulineq kommunit suleqatigalugit pissaaq, ilisimasatigut tunngaveqarluurtumik aamma ataatsimoorlumik suliassamut isiginninnikkut.

Qulaani pineqartut pissutigalugit, utoqqaanerusunut naleqquttunik najugaqarfinnik sanasoqarnissaanik siunnersuutip itigartinneqarnissaa Naalakkersuisut innersuusutigaaq.